

AKHBAR : SINAR HARIAN

TARIKH : 23 SEPTEMBER 2021

KERATAN AKHBAR

Sungai Batang Kali berpotensi jadi 'Sungai mati'



Sungai Batang Kali di sini yang pada ketika ini dikategorikan sebagai Kelas 2 air bersih, dikatakan semakin 'ditekan' pencemaran akibat pelbagai aktiviti manusia sehingga menjejaskan kelestarian ekosistemnya. - Foto Bernama

HULU SELANGOR - Sungai Batang Kali di sini yang pada ketika ini dikategorikan sebagai Kelas 2 air bersih, dikatakan semakin 'ditekan' pencemaran akibat pelbagai aktiviti manusia sehingga menjejaskan kelestarian ekosistemnya.

Bukan sahaja air sungai semakin keruh, hidupan di dalamnya, terutama ikan kelah, tengas, sebarau dan baung yang dahulu banyak didapati di sungai berkenaan, juga didakwa semakin sukar ditemukan.

LEMBAGA URUS AIR SELANGOR
(UNIT KORPORAT)

Tidak mustahil sungai sepanjang kira-kira 20 kilometer di laluan ke Genting Highlands yang sering menjadi tumpuan pengunjung untuk beriadah pada hujung minggu itu mengalami pencemaran lebih buruk dalam masa terdekat, sekiranya usaha pemeliharaan dan pemuliharaan tidak dilakukan dengan segera oleh pihak berwajib.

Penduduk di kawasan tersebut percaya aktiviti penternakan ikan tilapia merah untuk tujuan komersial yang bertapak di situ sejak lebih 10 tahun lalu, serta beberapa projek pembangunan yang tidak mengikut prosedur sewajarnya di sekitar sungai berkenaan adalah antara punca utama pencemaran itu.

Majoriti penduduk, khususnya masyarakat Orang Asli suku Temuan, mendakwa kualiti air sungai merosot teruk dan mereka kini berdepan kesukaran untuk terus bergantung hidup pada sungai berkenaan.

“Kami memang tidak puas hati dengan projek penternakan ikan, ladang musang king dan projek pembangunan chalet ‘kayangan’ yang menyebabkan sungai ini tercemar. Dulu air sungai ini jernih dan kami jadikan ia lubuk rezeki.

“Tetapi sekarang ini tidak lagi, sebab ikan sungai sudah kurang akibat air yang semakin kotor. Kami masyarakat Orang Asli pun sudah tidak boleh lagi cari rezeki buru ikan sebab memang susah nak dapat.

“Pernah satu hari menjala, seekor ikan pun tidak dapat. Kalau dapat pun, berbau sangat hanyir sebab sisa daripada kumbahan penternakan ikan tilapia merah di hilir sungai ini,” kata Lee Ropah, 42 kepada Bernama.